

PREZENTACIJA GEODETSKIH INSTRUMENATA TOPCON – SOKKIA U SARAJEVU I BANJALUCI

Firma "GeoWild" d.o.o. iz Sarajeva organizovala je dva skupa, na kojima su predstavljeni geodetski instrumenti iz proizvodnih programa tvornica Topcon i Sokkia. Skupovi su organizovani:

- u Banjaluci 09.03.2010. godine u hotelu "Grand", gdje je bilo prisutno 45 sudionika,
- u Sarajevu, 10.03.2010. godine u hotelu "Grand", uz prisustvo 116 sudionika.

Mirza Selesković, direktor firme "GeoWild", otvorio je skupove i pri tome predstavio detalje o djelatnosti te firme, koja je autorizovani distributer proizvoda Topcon – Sokkia za BiH. Nakon toga je slijedilo prezentiranje novih dostignuća i proizvoda koji se nude na našem tržištu. Prvo su dati detalji o niveliru Sokkia SDL1X, koji prema specifikaciji proizvođača predstavlja najprecizniji digitalni nivelir na svijetu. Zatim je opisan veliki broj elektronskih tahimetara, počevši od najjednostavnijih Topcon GTS-100N do najkompleksijih Topcon GPT-9000A i Sokkia SRX. Naročita pažnja je posvećena softverskim rješenjima na tahimetrima, zahvaljujući kojima je moguće riješiti brojne zadatke na terenu. Potom su dati detalji o GNSS instrumentima, uključujući Sokkia GRX1, Topcon GR-3 i sl., a bilo je govora i o GNSS rješenjima za automatsko upravljanje građevinskim mašinama.

O elektronskom tahimetru Topcon IS i mobilnom integrisanom sistemu za pozicioniranje Topcon IP-S2, u svojoj prezentaciji govorio je Laszlo Szentpeteri, medažer prodaje Topcon-Sokkie za istočnu Evropu. Topcon IS je robotizovani elektronski tahimetar s integrisanom dvostrukom digitalnom kamerom. Zanimljivo je da se instrument može koristiti kao laserski skener. IP-S2 je integrisani sistem za mobilno kartiranje, koji obuhvata GNSS prijemnik, inercijalni mjerni uređaj, 360° digitalnu kameru, 3 LiDAR skenera, dekodere za točkove a mogu se dodavati i drugi senzori. IP-S2 se montira na vozilo i prikuplja georeferencirane podatke za objekte uz puteve, pri vožnji brzinom prilagođenoj uslovima na cesti.

Nakon prezentacija je slijedila diskusija a posjetioci su imali mogućnost praktičnog rada s izloženim instrumentima. Iz Topconovog proizvodnog programa prikazani su motorizovani elektronski tahimetar GPT-9003M, standardni tahimetar GPT-7501 i jednostavni tahimetar GTS-105N. Kada je u pitanju Sokkia, predstavljeni su klasični elektronski tahimetri SET 530 i SET 1X, robotizovani tahimetar SRX i trofrekventni GNSS prijemnik GSR2700 ISX.

Svi prisutni su mogli dobiti mnogobrojne informacije o najnovijim tehničkim rješenjima ove velike svjetske kompanije za razvoj i proizvodnju geodetskih instrumenata, softvera i geodetskog pribora.

Nedim Tuno